



23. Oktober 2024

UKA2024/76

**Peqatigiiffiit kattuffiillu sugaluartulluunniit, nammineq kajumissutsimik ingerlanneqartuni aningaasanik katersuiniarneranni nipilersortartunik Namminersorlutik Oqartussaniit tapiiffigineqarlutik tikisitsisinnaanerat pillugu Naalackersuisut piareersaateqaqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Doris Jakobsen Jensen, Siumut)

Siumut sinnerlugu siunnersuuteqartoq Doris J. Jensen qutsavigaarput.

Aningaasaateqarfik pilersinneqarsimasoq tunngavimmigut pitsaasuvoq, atorluarneqarsimaqaarli aningaasammi tapiissutigineqartartut septembereqaannalersoq nungunneqarsimallutik, kingornalu qinnuteqartartut itigartinneqartarsimallutik. Aningaasaliissutit annertusineqassappata marloriaatai pisariaqartinneqarput, Siumumiilli aningaasaliissutit amerlineqassappata isumaqarpugut pitsaasumik siunertalinnut atorluarneqassasut, taamaattumik isumaqataavugut.

Siunnersuuteqartup tunngavilersuinermini oqaatigisaattut, qinnuteqartarfiup siammasinninngorlugu "qasukkarlugu" qinnuteqarfigineqarsinnaanngornissaa siunnerfigineqarpoq.

Timersoqatigiiffiit kattuffinnut arlaannaannut tunuliaqutaqarlutik ilaasortaasariaqannginneranik "qasukkaaneq" tunngaveqartoq Siumumiit taperserparput, taamaalillutik peqatigiiffiit "kikkulluunniit" qinnuteqarsinnaalerlutik.

Siunnersuummi timersoqatigiiffiinnaanngikkaluartut peqatigiiffiit nipilersortartunik tikisitsinissamut suliaqarnissaminnik, peqatigiiffittut ingerlagunik nalunaarsorsimasut "kikkulluunniit" qinnuteqarsinnaalernissaanut periarfissinniarlugit siunnersuuteqartup tunngavilersuutigivaa. Siumumiillu ilaleratsigu oqaatigissavara, tassami piorsarsimassutsikkut suliaqarneq piffinni iluaqutaasarput, minnerunngitsumik pinaveersaartitsinikkut aamma ilaqutariippassuarput iluaqutaasarluni.

Siunnersuuteqartoq Doris J. Jensen siunnersuutaa tamakkiisumik taperserparput, kiisalu Naalackersuisut "aarleqqutaat" qinnuteqartartut amerlinissaannik kinguneqarsinnaanera aningaasaliissutillu amerlinngippata itigartinneqartartut amerleriangaatsiassasut oqariartuutigalugit. Taamaattoq aningaasaliissutit amerlineqassappata iluarisimaarneqassaaq taamaalillutik pikialaernerit annertusinerannik kinguneqassalluni, tamanna Siumumiit nuannaarutigissavarput siunnersuullu akueralugu.

Siumumiit taamak oqaaseqarluta ataatsimiititaliamut susassaqartumi ingerlateqqipparput nalilersorluarneqarlunilu eqqartorluarneqassasoq kissaatigalugu.

Lars Poulsen, Siumut